


Hopi elogio y reconocimiento pa cu maneho y vision di Minister di Cultura Sr. Otmar Oduber



ORANJESTAD (AAN): Relacionista Publico di Departamento di Cultura a entrevista Sr. Ramon Todd Dandare, Armando Goedgedrag y Sra. Osaira Muyale relaciona cu e presentacion di e maneho y vision di Minister di Turismo, Transporte, Cultura y Sector Primario Sr. Otmar Oduber.

E linguista Sr. Ramon Todd Dandare a expresa palabranan di elogio y reconocimiento pa Minister Otmar Oduber relaciona cu su presentacion y discurso elocuente durante e Cumbre Nacional di Cultura referiendo na e bon uzo di e idioma Papiamento y e vision pa crea un economia di cultura. Na Aruba nos tin un cultura tipico y un cultura multicultural, sin descarta e cultura di barrio y e bon uzo di nos idioma Papiamento. El a bisa bon cla cu cultura ta nos bida. Dandare a subraya cu recientemente relaciona cu plataforma di herencia cultura el a haci entrega di 36 punto den cuadro di e kadernota

na minister y ta spera cu esakinan lo haya nan debido atencion. Su deseo ta pa realisa anualmente un festival culinario multicultural.

E hoben Armando Goedgedrag ta di opinion cu na Aruba mes tin hopi cos pa aprecia y siña for di dje pa loke ta trata nos cultura. No ta necesario pa biaha bay afo, sino inculca enseñanza di nos

historia y herencia cultural di e manera ey e hobennan por ta mas conecta cu nan propio cultura. Finalmente el a remarca cu el a keda sumamente impresiona cu tur e informacion cu el a ricibi durante e Cumbre Nacional di Cultura.

Sra. Osaira Muyale, Artista tabatin hopi palabra di elogio pa nos Minister di Cultura. E

tabata sumamente orguyoso di e forma con e ministerio di cultura a trata pa yega na un maneho integral di cultura y turismo haciendo esaki e base primordial di nos economia.

Cu e entrevistanan aki ta demonstra nos comunidad ademas di ta di acuerdo cu e maneho y vision di Minister Oduber ta admira tambe e proceso cu a uza

tur stakeholders pa yega na un vision y maneho comun. Conociendo e ambicion di Minister Oduber lo duna continuidad di intercambio consultativo den futuro pa alcanza nos meta primordial esta di haci cultura e base y e fuente pa fortifica nos economia usando e concepto di integra cultura y turismo.